



**Winterheil (Sommerheil)|| Der Kleinen Catho-||lischen
Postill/ Jacobi || Feuchthij/ Weyhbischoffs|| zu Bamberg/
der H.|| Schrift D.||**

Darin[n]en kürztlich vn[d] Catholisch/|| alle Sontägliche Fest vn[d]
Feyrtägliche|| Euangelien ...

Feucht, Jakob

Cöln, M.D.XCV.

VD16 F 850

Am Tag der Kyrchweyhung.

[urn:nbn:de:hbz:466:1-61414](https://nbn-resolving.org/urn:nbn:de:hbz:466:1-61414)

gen Augspurgischen Bischoff Ulricho/ auch von
der Clerisey gemelter Kyrchen zum Bischoff
gemacht vnd auffgenomneu/ war im Glauben
vnd Religion so groß/ daß er auff dem Wasser
wanderte/ lehret sein Volck trewlich/ bauwet
Spitäler vnd Kyrchen/ nam auff die Armen/
ligt in S. Mauriken Kyrchen begraben/ vnd
bittet GOTT für vns.

Euangelien vnd Predigen/ wie am
Tag Wilibaldi/ Henrici/ Mar-
tini &c.

Am Tag der Kyrchweyhung/
Euangelium Luc. xix.

In der zeit zog IESVS
hinew/ vnd gieng durch
Jericho. Vnd sihe/ da
war ein man/ genant Za-
cheus/ der war ein ober-
ster vnder den Publica-
nen/ vnd war reich/ vñ begerte IESVM zu
sehen/ wer er wär/ vnd vermogts nit für
dem volck/ denn er war klein von Person.
Vnd er lieff fur hin/ vnd stieg auff einen
wilden feigenbaum/ auff daß er ihn sehe/
den da solt er her kofien. Vnd als IESVS
kam an die selbē stett/ sahe er auff/ vñ ward
sein gewar/ vñ sprach zu ihm: Zachee/ steig
eilends herab: den heut muß ich bleiben in
deinem hause. Vnd er stieg eilends herab/
vnd



vnd nam ihn auff mit freuden. Do sie das
 sahen/murmelten sie alle/das er bey einem
 Sünder eynkeret. Zacheus aber stunde/
 vnd sprach zu ihm: Sihe Herr/die helffe
 meiner güter gebe ich den armen. Vnd so
 ich jemand betrogē hab/das gebe ich vier/
 fältig wider. IESVS aber sprach zu ihm:
 Heut ist disem hause heil widerfaren/dar/
 umb das auch er ein Sohn Abrahams ist.
 Denn des Menschen Sohn ist kommen
 zu suchen vnd selig zu machen/das verlo/
 ren war.

Matth. 13.

Zachee/ steige eilends herab/ dann heut
 muß ich bleiben in deinem
 hauß. Luc. xix.

Die



Ie vrsach/ darüb wir alle auff
 heut hieher in diß Gottshauß zu-
 samen seynd kommen/ wissen wir
 wol/ oder sollen doch solche billich
 wissen. Seiternaln diser Tempel

Vrsach diser
 versammlung.

oder kyrch/ vor etlichen Jaren/ auff disen heu-
 tigen tag geweyhet / das ist/ GOTT dem All-
 mechtigen zu lob vnd Ehren/ allein ihme vnd sei-
 nem Dienst/ als darinnen zu Predigen/ auffopf-
 fern/ die H. Sacramēten reichen/ Bitten/ Bet-
 ten/ danck sagen/ genslich zugeeignet ist worden/
 vnd also forthin Weltliche hendel darinnen nit
 sollen volnbracht werde/ kommen wir auff heut
 widerumb zusammen/ derselbigen Weyhung vnd
 zueignung jährliche Bedechnuß zu halten / vnd
 abermal zu volnbringen das jenig/ was sich al-
 hie als im Gebetthauß (wie es der Herr selbst
 genennet) zu verrichten gebüren wil.

Diser rechter gebrauch der Kyrchweyhung/ **Kyrchwey-**
 wirdt diser zeit nit allein von Vncatholischen/ **hung wurde**
 welche alle oder doch nit wenig kyrchen zer- **mißbraucht.**
 schleipffen/ vnd alles was vnser Catholische
 Eltern durch den Namen GOTTES dareyn
 geschenckt / herauß nehmen/ sonder auch von
 den Catholischen/ mißbraucht/ vnd machen auß
 einer kyrchweyhung ein kuchenweyhe/ kommen
 nit von der kyrchen/ sonder von der kuche we-
 gen/ vnd erwan gar nit zum Ampt der H. Mess/
 sonder nur zum schlamp/ weder zur hörung des
 Wort noch Dienst GOTTES/ sonder zum es-
 sen vnd trincken/ dabey man es doch jekund nit
 bleiben lasset.

Wie.

Wiewol es diser zeit sehr nützlich/ oder doch gewis notwendig were/ weitläuffig vnd außfürlich von disen beiden handeln/ nemlich vom rechten gebrauch vnd mißbrauch der Kyrchweyhung/ wil solchs doch vnser fürhaben diser kleinen Postill nit gestatten. Wöllen derhalben heut/ wie diß Jar auch in anderen Euangelien beschehen / bey dem Text diß jekund verlesens Euangelij bleiben / vnd gemelte Puncten biß auff künfftiges Jar (do vns GOTT das leben/ gesundheit vnd sein Gnad verleihen wirdt) anstehn lassen.

Theilung
vnd Inhalt
diser Predig.

Was sich im heutigen Euangelio zwischen Christo vnd Zacheo biß dahin verlossen/ daß er den Herren zur Herberg auffgenommen/ wöllen wir im ersten Theil diser Predig anhören. Im andern: Was sich volgents biß zum ende begeben. GOTT wölle mir vnd euch solchs zu reden vnd anhören sein Gnad mittheilen ic.

Luc. 18.

Wann sich
diß heutg
Enägeltum
begeben.

In dem anfang diß heutige Euangelij bezeugt der H. Euangelist Lucas: Das Christus der Herr (nämlich an einem Donnerstag/ welcher der sibenzehnest Martij/ des drey vnd dreißigsten Jars Christi gewesen ist) mit seinen zwölff Jüngern von Galilea hinauff gen Jerusalem gangen sey/ vnd auff dem wege angezeigt: Wie er zu Jerusalem gefangen/ getödtet vnd widerumb aufferstehn werde ic. Vnder solchem begibts sich daß ein Betler so blind gewesen/ heraussen vor d Stadt Jericho gessen vnd geberlet/ diser/ als er von anderen vernommen/ daß IESVS von Nazareth

reth fürüber gieng/ steng er an zu rieffen vnd
 vmb hilff schreyen daß er möchte sehend werden/
 vber welchen sich der Herr erbarmet vnd gese-
 hend gemacht hat. Auff solchs volget diß heutig
 Euangelium also: In der zeit (wie jekund ge-
 meldet) zog IESVS hineyn/ vnd gieng
 durch Jericho. Wir haben jekund gehört wo
 IESVS diß mal hingezogen ist/nämlich gen Je-
 rusalem. Die vrsach aber seines hin vnd her rei-
 sens im Jüdischen/Galileischen land/vnd ande-
 ren örtern mehr/haben wir diß Jar zweifels oh-
 ne mehr als nur ein mal angezeigt/ könden sol-
 che auch schier auß allen Euangelien/ vnd nur
 leichtlich abnehmen/darumb: Daß er suchen
 wolt das verloren war/nit allein diser vrsach/
 daß er die francken gesundt machen vnd andere
 Wunderzeichen mehr volnbringē wolt/sonder/
 daß er sich selbstē mündtlich durch seine Predi-
 gen den Sohn GOTTES/den wahren ver-
 sprochnen Messiam nennen/bekennen vnd zu er-
 kennen geben wolt/wie dan beschehen/auff daß
 sich volgens niemands seines Unglaubens in
 ihn zu entschuldigen hett/vnd do jemandts dar-
 über verdampft würde/beschweren könnte. Diser
 vrsach ist er auch dißmal (nach deme er von Za-
 cheo geschiden) gen Jerusalem auff einer Ese-
 lin eyngeritten/vnd als bald darauff im Tempel
 geprediget.

Als er noch ein tagreiß gen Jerusalem het-
 te vnd gen Jericho kommen/ sihe/da war ein
 Man genant Zachheus/der war ein Ober-

12

ster

Ursachen
 der reissen
 Christi.

ster vnder den Publicanen/ vnd war reich.
 Die Publicanen/ das ist/ die jenigen leut/ so im
 Namen vnd auß beuelch des Keyfers zu Rom
 vnd anderer Herrschafften den zol vnd was der
 gleichen mehr ist/ von den Jüden vnd Heyden
 eyngebracht haben/ wurde von den andern Jü-
 den auch Heyden sehr gehasset/ für Gottlose leut/
 vnd grosse ja gemeine vnd öffentliche Sünder
 vnd Schinder gehalten/ vnd villicht nit vnbil-
 lich. Dann als nit zu zweiffen/ wirdt domaln dis
 gemein Sprichwort im gang vnd schwang ge-
 wesen seyn: Es ist (nit bey allen/ aber gewißlich
 bey ihren vilen) kein ämptlin es ist hecken-
 werth. Ob gleich dem Keyfer zins/ steur/ rent
 vnd gült/ zol vnd dergleichen/ weder geben noch
 eynbringen nit vnbillich noch Sünd ist/ wegen
 Schutz vñ schirm/ wege Brucke/ Wege/ Stege/
 Pflaster vnd dergleichen/ so lassen doch die Zöl-
 ner/ Pfleger/ Kastner/ Bögt/ Amptleut/ Schrei-
 ber vnd was dergleichen (erlich vnder ihnen)
 Schrifftgelehrten vnd Phariseer mehr seynd/
 bey dem rechten tax/ zol vñ zins nit gern bleiben/
 machen immer ein strichlin zum Nulla auff das
 zehne darauß werde/ damit sie/ wo nit mehr/ doch
 auch einen solchen theil dabey haben/ dauon sie
 auff das wenigste ihre schuch schmiren/ dauon
 mehrmaln Keyser/ König/ Fürsten vnd Herren
 nit vil wissen/ aber doch nichts desto weniger die
 armen vnderthonen/ vnd die jenigen so zu Wa-
 gen/ Pferd oder fuß vber land reisen/ in ihrem
 beutel wol empfinden. Solche Zölner/ Schind-
 fessel/ vnd wie mans auff Teutsch anderst nen-
 net/

Publicanen
 Sünder vñ
 Schinder.

Gemein
 Sprich-
 wort.

net/waren auch domaln die Zölner bey den Jüden/welchs die anderen Jüden wol gewist/ vnd derhalben ihnen so feind als dem Teufel gewesen/vñ nit gern gesehen/ja herziglich (wie auch im heutigen Euangelio) hat es sie verdrossen/wann sie gehört daß Christus der Herr bey einem Zölner eynkert hat.

Ein solcher Zölner/ ja ein Oberster vnder den Zöllnern war diser heutig Zacheus/ welcher/ als der Euangelist bezeugt/ reich war. Warumb vnd wie diser Zacheus reich sey worden/ bedarff nit vil fragens. Ist leichtlich auß obgemelten worten zu lernen/ nämlich mit seinem schinden vnd vbernehmen der armen leut mit dem zol vnd anderer finankerey vnd betriegeren mehr. Dem Keyser hat er ein- weder den zol abkaufft vmb ein genante Summa auff ein oder so vil Jar/ vnd volgens das arme Volck vbernommen wie er gewolt hat. Oder aber er hat dem Keyser den zol gefordert vnd ihme selbstem auch einen. Dann es ist nit der brauch bey grossen Herren/ daß sie den Zöllnern/ Schreibern/ Sanklisten/ Bögten zc. vber zwenzig oder dreissig/ ja etwan kaum ein ganzes Jar zehen gulden geben: Den Juristen/ Amptleuten/ Räten achtzig/ erwann sechzig/ hundert/ oder gerath es wol anderthalb hundert gulden/ also/ daß sie gnug beschaffen/ daß sie sich selbstem/ Weib/ Kind vnd gesind ernehren. Daß aber Zacheus mit einer so kleinen besoldung so reich ist worden/ daß/ wie vnd warumb erwann auch obgemelte

Zacheus
warumb vil
wie er reich
sey worden.

(nit alle/ sonder etliche) in wenig Jaren eigne
 Heuser/Schlösser/Dörffer bekommen/in guld-
 nen fetten hereyn treten/ schreibet Lucas im
 heutigen Euangelio nit vil dauon: Judas mit
 seinem Beutel/ vnd Longinus mit seinem Ju-
 denspieß/ damit er Christum in sein seiten gesto-
 chen/ also/ daß Blut vnd Wasser heraus gelos-
 fen/ wissen besser hierauff zu antworten dan ich.
 Die Fürsten/ Herren erfarens zu zeiten/ aber
 gemeinglich zu spat/ wann nemlich sie so arm
 werden/ daß sie auch blut vnd wasser spenen
 möchten/ wann sie ihr eigen Gelt von ihren
 Råthen entlehen/ vnd grossen Bucher dauon
 geben vnd ihnen etwann zu letst gar weichen
 müssen/ also/ daß sich hieher nit vbel füat das
 jenig lächerlich Sprichwort: Do der Papp
 zum Keyser/ Bauern/vñ Juristen saget: Ich
 bitte für euch alle drey. Der Keyser/ Ich beschli-
 ke euch alle drey. Der Bauer/ Ich arbeite für
 euch all drey. Der HofChrist/ Ich frisse euch
 all drey zc.

Friss daß
 dir der
 Fresser ge-
 segne.

Zacheus
 auß einem
 Sünder ein
 Papper.

Jedoch, müssen wir mit Zacheo etwas mil-
 ters handeln/darumb/weil er diser zeit kein Zöb-
 ner/ Sünder oder Schinder/sonder ein Papper
 war/hette sich des liegens vnd betriegens abge-
 reit abgethon/vñ dis nit allein/(dan dis die Ge-
 ligkeit zu erlangen nit gnug gewesen were) son-
 der auch seinen Diebstal/Betrug vnd Bucher/
 vnd noch mehr widerumb geben/dauon im an-
 dern Theil diser Predig.

Diser Zacheus begeret IESVM zu sehen
 wer er wår. Dise heutige reise Christi des Her-
 ren

ren gen Jerusalem/ ist wenig tag vor seinem H.
 Leiden vnd tod geschehen/ also/ daß der Herr vor
 diser zeit mehrmaln zu Jerusalem gewesen ist/
 derowegen diser Zacheus vil von ihme gehört
 hat/ von seiner lehr/ von seinen Wunderzeichen/
 von verzeihung. der Sünd/ aller der jenigen so
 ihne auß innigkeit ihres Herzes bitten. Ist der-
 halben nit vngleublich/ daß diser Zacheus den
 Herren/ neben anderen vrsachen auch darumb
 gern gesehen hette: Ob ihme auch/ wie Mattheo
 der auch ein Zolner gewesen/ wie Marie Mag-
 dalene so ein gemeine Sünderin/ vnd jener Eh-
 brecherin/ von ihme Guad/ heil/ nachlassung vñ
 verzeihung seiner Sünd widerfaren möchte/ set-
 temaln er rew vnd leid darüber habe/ vnd albe-
 reit dauon abgestanden sey/ seye auch willig vnd
 vrbittig seine Sünd ihme Christo dem Herren
 namhaftig zu erzellen vnd beichten/ vñ vber diß
 alles wölle er auch alles vnbillichs bekommen
 gelt vnd gut/ vnd noch mehr darzu/ widerumb
 geben. Vnd/ das noch mehr ist/ wölle er auch
 würdige frucht der Pusz/ nämlich den dritten
 theil/ die Gnugthuung für die hand nehmen/
 vnd den halben theil seiner Güter den Armē ge-
 ben/ also/ daß an seiner Pusz nichts mangeln
 noch an ihme abgehn solt.

Seitemaln aber dem Herren Christo auch
 dißmal/ vil Volcks vor vnd nachvolget/ vñ Za-
 cheus von Person klein war/ könnte er doch
 auß herrlicher begirdē nit vnderlassen den Her-
 ren zu sehen/ gedencet hin vnd her wie ihme
 doch zu thun daß er den Herren sehen möchte/

Sünder
sollen von
Zacheo ler-
nen.

lieffe derhalben vorhin / vnd stiege auff
einen Wildenfeigenbaum / auff das er
ihn sehe / denn da solt er fürüber kommen.
Wolte GOTT das auch wir Sünder alle / nach
dem Exempel Zachei / ein herziglichs verlan-
gen hetten Christum zu sehen / verzeihung vn-
ser Sünd vnd sein Göttliche Gnad zu erlan-
gen / vnd diß wie bald er je besser / welchs wir ge-
wislich / waß wir nur selbstn wolten / wol thun
könten / wann vnd wie bald wir wolten. Ist
auch nit von nöten / wie dem Zacheo / das wir
weit lauffen oder hoch steigen / alle augenblick /
an allen orten könden wir Christum finden / zu
allen zeiten wann wir nur wollen wil er sich fin-
den lassen. Versprochen hat er vns mehrmalt
im alten vnd newen Testament / das er vns er-
hören wölle / so bald / wie bald wir zu ihme schrey-
en werden. Er wölle vns vnser Sünd verzei-
hen / wie bald vnd wann wir Puff thun wer-
den : dann so wahr er lebe / so begere er nit den
tod des Sünders / sonder / das er sich bekere vil
lebe. Vnd alle die jenigen so mit waserley anli-
gen beladen seynd / sollen nur fecklich zu ihme
kommen / so wölle er ihnen gern helfen. Lasset
vns derhalben (ihr geliebten in GOTT) fort-
hin nit / wie etwann bishero geschehen / in der
Sünd stecken / sterben vnd verderben / sonder
mit Zacheo zu Christo lauffen / ihne sehen /
vnd vmb hilff bitten / so wirdt er vns gewislich /
so wenig als Zacheum außschliessen / sonder
gern annehmen / vnd zu vns wie zu ihme sagen.
Zachee

Zachee steige eilends herab / denn heut
 muß ich bleiben in deinem hause. Mehr
 hat Zacheus erlangt dann er begert hat / ja
 mehr weder er hette dörrffen begeren. Er begert
 RESVM zu sehen / er hat ihne gesehen. Dieweil
 dann der Herr sein gemüt / sinn vnd gedanken / **Gott erkentte**
 bekerung vnd Pus gewist / wolte er auch in sei- **alle hertzen.**
 nem Haus eynteren vnd Herberg darinnen ha-
 ben. Vnd gewislich nit allein leiblich in sei-
 nem hauß / sonder auch Geistlich mit seiner
 Gnad in seinem Herten. Wie sich aber hierauff
 Zacheus verhalten hab / spricht der Euangelist :
 Vnd er stige eilends hernider / vnd name
 ihn auff mit frewden. Gewislich muß sich
 Zacheus ober diser freundlichen zusprechung
 vnd begeren Christi / sehr vnd hoch erfreuwet
 haben / ja so sehr / daß ihme selbstn solche frewd
 außzusprechen nit möglich gewesen were. Lieber
 ist ihme gewislich dise borschafft gewesen / dann
 wann man ihme vil Gelt vnd Gut geschenckt
 hette / darumb / daß er doch seinem herten ein-
 mal recht raumen solt / erzellen seine Sünd / sein
 fürnemen vnd Pus eröffnen / wie leichtlich auß
 dem jenigen so im Text hernach volget / abze-
 nemmen ist.

Also müssen ihme auch wir Christen thun. **Lehr an alle**
 Wan wir nur als Sünder zu Christo geloffen / **Christen.**
 ihne vmb verzeihung gebettē / vnser Sünd ihme
 vnd seinem Kyrchendiener bekennē / Absolution
 vnd verzeihung derselbigen erlangt / sollen wir
 GOTT nit allein höchstes lob vnd danck sagen /

sonder Christum IESVM mit aller frewd zur Herberg an vnd auffnehmen/ vnd diß solcher gestalt: Im H. Sacrament des Altars ist Christus IESVS vnder gestalten Brot vnd Weins (wann die wort der Eynsetzung von einem Catholischen Priester darüber gesprochen werden) mit Leib vnd Seel/ fleisch vnd blut/ Gottheit vñ Menschheit/ dasselbig sollen wir/ willig/ mit andacht vnd höchster Ehrerbietung empfangen/ so herbergen wir Christum nit nur eufferlich/ sonder auch innerlich vnd leiblich/ nit in vnserm hauß/ sonder in vnserm Herzen/ welchs wir wann wir nur selbstn wollen/ alle tag velnbringen könden. Vnd diß sey gnug vom ersten Theil diser Predig.

Noch ist außzulegen vberig das Besprech/ so Christus der Herr vnd Zachaeus miteinander gehalten habē. Zuor wollen wir anhören was die Phariseer sampt anderen Jüden dazu gesagt/ daß Christus bey einem Zolner eynkert hat? Da sie das sahen/ murmelten sie alle/ daß er bey einem Sünder eynkeret. Diß ist die mißgunst der alten Schlangen des Teufels sampt seines anhangs/ gegen Christo dem Herren vnd den seinigen. Dise Bleibnerische Phariseer fragten nit vil nach Christo dem Herren/ begerten nit von ihme/ daß er bey ihnen solt eynkeren/ vnd mißgönten dem Zachaeo/ daß eben er als ein Sünder ihne zur Herberg auffnehmen solt. Sie selbstn wolten nit weder frumb noch gundt

Mißgunst
des Teufels
vnd
seines an-
hangs.

sunde werden / thut ihnen doch zorn / daß Za-
cheus den Arzet bey sich hat / der ihme an der
Seel helffen kan / vnd gern wil / vnd geholffen
hat. Noch seynd vnder oder neben andern zwo
vrsachen / darumb dise Phariseer vnbilllich ge-
murmelt haben. Erstlich / daß sie gesagt: Chri-
stus habe bey einem Sünder eynfert / welches
nit wahr war / seitemaln Zacheus domaln nit
mehr ein Sünder / sonder ein Puffer / war nit
mehr ein Zolner vnd betrieger / sonder ein wi-
derumb geber des jenigen was er vnbilllich be-
kommen hat / wie dann als bald auß seiner
selbst eigen bekantnuß erweisen soll werden. Dar-
umb fürs ander / weil sie die vrsach nit gewist
haben oder ja nit haben wollen wissen / warumb
der Herr Christus auff Erden kommen / vnd
mehrmaln mit den Sündern gessen vnd ge-
truncken / gehandelt vnd gewandelt / geredet
vnd gemeinschafft gemacht hat. Dit darumb /
daß er ihme die Sünd gefallen liesse / als ob er
die Sünder in ihrer bosheit loben wolte / vil
weniger darumb / daß er sich ihrer Sünd theil-
hafftig machen vnd mit ihnen sündigen wolt.
Nein / sonder diser vrsach / wie er selbst im
beschluß diß heutigen Euangelij bekennet hat:
Denn des Menschen Sohn ist kommen /
zu suchen / vnd selig zu machen / das verlos-
ren war. Ein gesunder bedarff keines Arzts /
sonder der franck. Weil dann Zacheus noch
franck gelegen an der Seel / mußte er einen
Geistlichen Arzt haben der ihne gesundt machet /

Warumb
der Herr ge-
meinschafft
mit den sün-
dern gehabt.

diser war Christus GOTT vnd Mensch/ GOT-
TES vnd MARIAE Sohn/diser wolt Zacheum
gesundt machen/diser konte Zacheum gesunde
machen / diser hat Zacheum gesunde vnd aller
Sünd ledig gemacht/ nit weniger als Mariam
Magdalenam / zu welcher er gesagt: Ihr wer-
den vil vergeben/dann sie hat vil geliebt. Also
mögen sich auch alle Beichtuätter vnd vorste-
her der Kyrchen / gegen den vngesährlichen
Sündern vnd denjenigen so vom Catholischen
Glauben versürt vnd abgewichen seynd/ verhal-
ten. Nit von nöten/weder nützlich noch rathsam
ist es/ daß man an einem Sünder vnd Vncatho-
lischen Menschen als bald verzweifeln / ge-
schwind dem Teufel vnd der Ewigen verdam-
nuß vbergebē/ dem Züchtiger in sein hand schen-
cken oder des Landts verjagen wölle. Nein/ sie
sollen zu vor ein ja etliche mal angeredet werden/
daß sie vom sündigen leben abstehn vnd den
Catholischen Glauben widerumb annemen
wollen/ sollen auß Göttlicher heiliger Schrifft
vnderrichtet vnd ihres irrthums vberwisen
werden/ ihnen des Catholischen Glaubens/ vnd
fürnemlich derjenigen Artikel vnd Puncten
darinnen sie zweifeln/ satten vnd gründlichen
Bericht geben. Dann das ist gewiß (wie ichs
selbsten im ein vnd zwey vnd sibenzigsten Jar
in augenscheinlicher erfahrung gehabt) daß man-
cher Mensch vom Catholischen Glauben zu
einer Sect vnd neuwen Vnglauben so buck-
let kompt/ daß er gewißlich selbsten nit weiß wie
oder warumb: solchen ist noch zu helffen/ solche
soll

Wie man
sich gegen
den Sün-
dern vnd
Vncatholi-
sche verhal-
ten soll.

fol man in irrthumb nit stecken lassen / sonder widerumb heraus helffen. Do aber der Sünder ein Sünder / der Kezer ein Kezer bleiben / verharren / also sterben vnd verderben wil / soll man einen solchen / nach der Regel des H. Pauli / seitemaln er vber drey mal ermanet / sich aber doch nit bekeren wollen / meiden / vnd für einen solchen halten / als der auß seinem eignen vrtheil verdampft ist. Mit einem solchen / an welchem alle lehr / ermanung vnd vnderricht / gute vnd böse wort / Chrisam vnd Tauff verloren ist / mag man wol dem küfenster zu lauffen / vnd immer faren lassen wohin er wil / oder auch wohin er nit wil. Vnd diß von der vrsach darumb Christus bey Zacheo cynkert hat / vnd wienerr mit den Sündern vnd Vncatholischen gemeinschaft zu machen sey.

Kezer send auß eigned vrtheil verdampft.

Was Zacheus zum Herren gesagt / wollen wir jezund auch anhören: **Sihe Herr / die helffte meiner güter gib ich den Armen. Vnd so ich jemand betrogen hab / das gebe ich vierfeltig wider.** Diß hat Zacheus nit diser vrsach gesagt / als ob er sich selbstn dadurch loben / berümen vnd preisen wolt / wie frumb / wie barmherzig er sey / oder daß er von Christo vnd andern vmbstehenden / so solchs von ihme gehört / gelobt würde. Nein / sonder / weil er sich nit geschampft hat weder vor GOTT noch vor der Welt / öffentlich zu sündigen / fürchtet er sich auch nit öffentlich vor GOTT vñ der Welt sein Sünd vnd sein Puß zu bekennen / auff daß ihme

GOTT

Zacheus lobet sich selbstn nit.

GOTT dise vnd alle seine Sünd gnedig verzeihen wölle.

Gar recht vnd wol hat diser Zacheus/ so ein Zolner/ ein grosser Sünder vnd Schinder/ ein Bucherer vnd betrieger gewesen ist/ sein Pusz angestellt vnd vollendet/ gewislich nit auff Luthersche sonder durchaus auff Catholische weis. Ja die drey Hauptstück Catholischer Pusz/ hat er vollkommenlich gehabt/ gebraucht/ vñ derhalben der Sünden ledig vnd gewislich des Ewigen lebens theilhaffrig worden.

Drey theil
Christlicher
Pusz.

Kew der 1.
Theil der
Pusz.

Erstlich hat er gehabt die Kew vber seine Sünd so er bösslich begangen hat. Vnd diser vrsach ist er vom sündigen leben abgestanden/ vnd nit mehr gewuchert/ gelogen noch betrogen/ sonder mit Mattheo vom Zolhaus hinweg gangen. Dan ohne die Kew ist alles anders Pussen vmb sonsten vnd gentslich vergebens.

Beicht der
2. Theil der
Pusz.

Fürs ander hat er gehabt die Beicht. Dann/ ob gleichwol domaln/ weder er/ Mattheus/ Petrus/ Magdalena vñ andere Sünder zur Priesterlichen Beicht nit verbunden/ seitemaln zur selbigen zeit noch keine Priester des neuwen Testaments waren/ seitemaln Christus seinen Jüngern vnd anderen domaln den H. Geiss noch nit gegeben/ die schlüssel des Himmelreichs/ das ist/ den Gewalt die Sünden lösen vnd binden/ noch nit vberantwortet/ hette domaln den tod am Creuz noch nit gelitten/ auß welchem Creuzuerdienst alle Sacramenten (volgens auch das heilig Sacrament der Pusz/ welche im alten Testament kein Sacrament/ sonder ein

ein tugend gewesen ist) ihr krafft vnd wirckung haben / vnd derhalben denen im alten Testa- ment die innerliche Beicht zu GOTT gnug war / denn ihre Priester hetten von GOTT keinen gewalt empfangen die Sünd zu verzeihen / als wie die Priester im newen Testament / sonder nur vber den leiblichen vnd eusserlichen aussatz hetten sie zu vrtheilen. Dis alles ohne angesehen / sprich ich / hat dennoch Zachens nit allein GOTT / sonder auch einem Priester / ja dem Obersten Priester / welcher ein Priester ist nach der Ordnung Melchisedechs in Ewigkeit / nemlich Christo I E S V sein Sünd bekennet / daß er die leut betrogen hab nit geleugnet / vnd eben diser vrsach gebe er widerumb was er vnbillich eyngenommen hab / vnd noch mehr vber dasselbig.

Sacramen-
ten woher se
wirckung.

Zum dritten / auff daß ihme durch die wahre hergliche Reu vnd mündliche Beicht / nit allein die Sünd verzeihen vnd Ewige straff nachgelassen / sonder auch die zeitliche straff geschencket werde / gebraucht er sich auch des dritten Theils Christlicher Puff / vnd hat ihme selbstn wirdige frucht der Puff / nämlich ein Gnugthuung auffgelegt / als Almosen geben / vnd zwar den halben theil seiner Güter. Dise Puff war nit Lutherisch / alda man nur glaubt vnd sonstn nichts mehr oder doch gar wenig thut / darumb hat er auch verzeihung seiner Sünden erlangt. Also müssen auch alle Sünder auff den heutigen tag Puffen : Erstlich von grund ihres Hergens Reu vnd leid vber ihre Sünd haben. Zum andern / solche

Gnugthu-
ung der
dritte Theil
Christlicher
Puff.

solche GOTT vnd dem Priester beichten. Zum dritten/die aufferlegten Pusz gern annehmen vnd erfüllen.

Zwey not-
wendige
Punctlin.

Noch seynd auß diser Pusz Zachei zwey Punctlin wol zu mercken. Eins betrifft ein vollkommenliche Pusz. Das ander/das Almusen geben. Das muß ein Sünder/jekund ein Puffer/wissen vnd wol mercken / wann er anderst recht Pussen vnd selig werden wil : Hat jemandts gestolen/gewuchert/ oder sonsten etlichs Gelt mit liegen vnd betriegen / mit falsch kauffen oder verkauffen/vnbilllicher weiß bekommen/so ist es nit gnug das man vber dieseibige Sünd reu vnd leid hab/ es ist auch nit gnug das man dieselbige Sünd beichte/ es ist auch nit gnug das man nit mehr stele noch betriege : sonder man muß das vnbillich bekommen Gut alles/ oder so vil noch im vermögen/ widerumb geben den jennigen/ welchen solchs vnbillich abgenommen/ oder ihren Erben/ oder/ do deren keiner mehr im leben/ in die Armen heuser/ vnd nit an statt eines Almusen / sonder zur Gnugethuning vnd widergebung. Also hat ihme auch Zachaus gethon. Nit nur das jenig so er vnbillich bekommen/hat er widerumb geben/ sonder noch drey mal so vil als er gefunden oder gestolen vndergen hat.

Mentiglich
wol zu mer-
cken.

Hilff lieber GOTT hilff/ Wann diser zeit alle Christen/ wie sie dann bey verlust ihrer Seelen heil schuldig seynd/ das jenig Gelt vnd Gut so sie vnbillich bekommen haben/ widerumb geben solten/wie bald wurde die ganze Welt sehen. Ob

Ob die Armen oder die Reichen mehr Fuchse
schauben / Guldine ketten / Silber Dolchen /
Schlöffer / Dörffer vnd heuser hetten. Einem je-
den so begert selig zu werden / wil ichs ernstlicher
zu bedencken vorbehalten haben.

Das Almusen betreffend: Wil jemandts daß
es GOTT angenehm vnd ihm verdienstlich seye /
so muß er wie Zacheus Almusen geben / näm-
lich / von seinen vnd nit von frembden oder an-
der leut gütern. Darumb spricht er: Den halben
theil meiner Güter gibe ich den Armen. Von eignen
Diser Zacheus hat zweyerley Gelt gehabt. Et- gütern muß
lichs / das er billich bekommen: Etlich / das er man Almu-
sen geben.
vnbillich ingehabt. Wolt nun iekund Zacheus
Almuse geben wie sichs gebürt / mußte er zu-
vor das frembde vnd vnbillich bekommenes
Gelt hinweg thun vnd widerumb geben / als
dann erst Almuse geben von seinem eignen
vnd billichen Gelt. Vnd diß ist wider solche
leut diser zeit / so etwas stelen / vnd eben dassel-
big widerumb Almuse geben vnd vil damit
verdienen wollen: noch mehr wider die jenigen /
so ein Roß stelen / geben ein Pfeiffen Almuse /
auff daß sie auff dem Roß in die Hell reiten
könden.

Auff solche Puff Zachei bekennet der Herr
Christus / daß seinem Haus heil widerfas-
ren sey. Nit allein ihm Zacheo / sonder auch
seinem Haus / seinem Weib / kindern vñ gansen
Gesind. Dann alle die jenigen so sich wissent-
lich vnd williglich frembdes Guts vnd Gelts
theil

Frembdes
guts vnd
frembder
sünd theil-
hafftig mer-
den.

Beschluß
difer Pre-
dig.

theilhafftig machen / werden auch der Sünd
theilhafftig. Weil dann Zacheus alles vnbillich
bekommens Gelt widerumb geben / ist nit allein
er / sonder auch sein ganges Haus / sein ganges
Hausgesind / der Sünd vnd straff derselbigen
sünd entlediget vnd heil widerfahren. Vnd diß
seye auff diß mal von kürzster Auflegung des
heutigen Euangelij gnug gehandelt. Vnd be-
halten wir kürzlich auß dem ersten Theil di-
ser Predig : Daß wir nit wie die Zölner (etlich
auß ihnen) mehr fordern vnd eynnehmen dann
sich gebürt / daß wir vns von allem frembden
Gut / ja von allen Sünden / so vil menschlich vnd
möglich / enthalten. Do es aber sach were / daß
wir sündigen wurden auß schwachheit vnser
fleischs / auß anreißung des Teufels / der Welt /
des Gelts / sollen wir doch ohne verzug mit Za-
cheo widerumb Christum suchen / zu ihme lauf-
fen / vnser Sünd bekennen / vnd vmb verzei-
hung bitten / dann auch ihne / im H. Sacrament
des Altars / in vnser Herß zur Herberg auffnem-
men. Doch (vnd diß auß dem andern Theil) daß
wir vber vnser Sünd / von grund vnser Her-
ßens Reu vñ leid habē / solche nit allein GOTT /
sonder auch dem Priester beichten / würdige
früchte der Buß wircken / alles frembde Gut
widerumb geben / forthin Gottes-
fürchtig / frumb vnd endt-
lich selig werden /
Amen.

Wir

Wir bitten dich O gütiger GOTT
 Herr I E S V Christ vmb deinen
 H. Geist/der vns vnser Herr er-

Gebitt zu
 Christo vna-
 serm Hei-
 land.

leuchten vnd jeder zeit also beystehn wölle/
 daß wir vns nit allein vom frembdē Gelt/
 sonder auch von allen Sünden enthalten
 mögen/auff daß wir nit auch Zölner/offne
 Sünder oder Bucherer/vñ volgentis ver-
 dampft werden. Weil aber O GOTT vn-
 ser fleisch schwach/der Teufel vñ die Welt
 listig vñ betrüglich/vñ also wir bald in die
 Sünd gerathen/wölle der H. Geist vnser
 Herr dahin richten/daß wir mit Zacheo
 herziglich dich zu sehen/suchen/beichten/
 Püssen/das frembde Gut widerumb gebē/
 dich mit fleisch vnd blut im H. Sa-
 crament empfahren/also frumb
 vnd endtlich selig wer-
 den/ Amen.

LAVS DEO, VIRGINI QVE MATRI,
 Saluo in omnibus SS.Sedis Apostoli-
 cæ iudicio.

m M

Res